

FILIALIS ADHAESIONIS LITTERAE
ROMANO PONTIFICI MISSAE A FA-
CULTATE NOSTRA THEOLOGICA OC-
CASIONE ENCYCLICAE
“ HUMANI GENERIS ”

Beatissime Pater

Inter fideles Ecclesiae filios quibus intimo cessit gaudio apostolicus Sanctitatis Vestrae interventus ad profligandos errores perniciosasque in campo studiorum ecclesiasticorum, opinioniones, quae nostris diebus serpere deprehenduntur, etiam Facultas Theologica Collegii Internationalis Ordinis Carmelitarum Discalceatorum de Urbe toto corde adnumerare exoptat.

Pluries iam Sanctitas Vestra, sive per Sacras Congregationes, eam imprimisque cui rerum fidei et morum tutandarum munus concreditum est, sive per Seipsam, ad rectam semitam revocare filios aut iam aberrantes, aut per lubricam incedentes viam conata erat. At nunc Encyclicae Litterae « Humani generis » S. V. solemnius, fusius ac data opera aperte edixerunt Ecclesiam non sine materna anxietate ac dolore nonnullos filios suos conspicere in periculo versari, eoque gravius urgere periculum quo sub specie irenici cuiusdam animi sensus erga oves quae extra Christi ovile vagantur, tegitur: acsi veritatis obtectio sive attentatio viam umquam ad sinceram fidei unitatem promovendam sternere possit.

Sapientissime autem Sanctitas Vestra solemniter hoc documento erroneas aut saltem lubricas perniciosasque opinandi rationes tum in his quae sive ad sacram theologiam sive ad exegesim sacrorum librorum pertinent, cum in illis quae ad philosophiam scientiasque quas positivas vocant, quatenus res fidei et morum attingunt eis subordinated, fortiter denuntiat, simulque errores ipsos, qui palam aut etiam — et quidem

potissimum — occulte iam diffundi ceperunt, aperte indicat, ut, eorum malitia cunctis patefacta et nota, vim nocendi admittant, eorumque insidia a scientiarum praesertim ecclesiasticarum tyronibus paveatur.

Quo vero ipsorum errorum radices, omnibus fere communes, aptius dignoscantur, Encyclicae Litterae praecipue denuntiant tum latentem agnosticisimum, quo si non apertis verbis, implicite tamen saltem asseritur aut supponitur humanam mentem numquam ad certam veritatis obiectivae notitiam reapse pervenire posse, tum immodicae erga magisterii Ecclesiae directionem independentiae spiritum etiam in rebus fidei et morum aut cum illis connexis, cui internus renuitur assensus, saltem dum solemnibus prorsus definitivis iudiciis non agitur. Ab his vero opinandi et agendi rationibus quae generalia eaque gravissima consecraria fluant, Encyclicae Litterae indicant. Theologiae videlicet scholasticae asserta, quae a veritatibus revelatis longo saeculorum decursu et virorum sapientia et sanctitate clarissimorum industria et labore deducta sunt, sensu ac valore destituuntur, ac si merae ad veritatem « approximationes » essent anteaquidem saeculis accommodatae, hodie vero penitus ad normam et gustum « philosophiarum » videntur reformandae. In rebus autem sive historicis et criticis, sive ad scientias « positivas » pertinentibus nimia quaedam et inconsulta festinatio ac propentior animus denuntiatur erga omne illud quod « modernitatem » sapiat, etsi limites forsitan merae hypotheseos nondum transierit.

Dum vero Sanctitas Vestra verum ac sincerum mentis obsequium erga ea quae sive philosophiam perennem sive inviolabile fidei depositum sive comprobatae Ecclesiae doctrinam respiciunt, iteratis verbis inculcat, minime quidem recentiora cuiuslibet scientiae cum sacrae tum profanae adinventae spernit, quin potius doctos Ecclesiae filios provocat atque impellit, ut sollerti studio ea omnia inquirant quae humanae investigationis progressus undequaque serio proferre comperiantur.

Cum itaque tantae rei causa in hoc solemnibus Apostolici Magisterii documento agatur, recta nempe ratio in studiis sacris peragendis servanda, ut fidelis integra eisdem veritatibus revelatis adhaesio sarta tectaque maneat, simulque « aliquam Deo dante mysteriorum intelligentiam eamque fructuosissimam » mens humana assequi possit, Facultas haec nostra Theologica Litteras Encyclicas « Humani generis » accurato studio ac ponderata meditatione exploravit, ut earum dictamina ad amussim opere impleat. Quinimo occasionem nacta Congressus Superiorum Provinciarum totius Ordinis in Urbe habiti, in solemnibus eorum conventu una cum Professoribus et Alumnis, ampla dissertatione ea quae Encyclicae Litterae aut praecavenda indicaverant aut mandaverant servanda,

exposita sunt, ut non solum in hac nostra romana Facultate Internationali, verum etiam ubique in toto Carmelitarum Discalceatorum Ordine dociles aures altissimo huic magisterio accommodentur.

Ad quam quidem mentium ac cordium erga genuinam Ecclesiae doctrinam docilitatem clarissima exempla atque eximia nostrorum Patrum Complutensium in rebus philosophicis, Salmanticensium vero in theologicis monumenta nos vehementer impellunt. Quibus omnibus, in rebus ascetico-mysticis aquilarum instar gloriose splendent Sancta Mater nostra Teresia a Iesu et Mysticus Ecclesiae Doctor S. Ioannes a Cruce.

Tantium Parentum ac Confratrum vestigia fideliter prementes Sanctitatis Vestrae documentis et institutionibus plenissimam subiectionem perlibenter pollicemur; simulque nos, pro modulo nostro, adlaboraturos spondemus ut sapientissima atque opportunissima monita ab omnibus, ad quos actio nostra quomodolibet pertingere poterit, in proximum deducantur.

Non aliud superest, Beatissime Pater, nisi ut iterum atque iterum Sanctitati Vestrae ob vigilans magisterium gratias ex corde agamus et Apostolicam Benedictionem Facultati nostrae humiliter imploremus.

*Datum Romae die 14 novembris,
festo omnium Sanctorum Carmelitarum, Anno Sancto 1950.*

FR. SILVERIUS A SANCTA TERESIA, *Praep. Gen. O.C.D. et Magnus Facultatis Theologicae Cancellarius.* - FR. VICTOR A IESU MARIA, *Facult. Theol. Praeses.* - FR. BENIAMIN A SS. TRINITATE. - FR. PETRUS-ALOYSIUS A S. CHRISTINA. - FR. NILUS A S. BRONCARDUS. - FR. PLACIDUS A S. ROSA. - FR. GABRIEL A S. MARIA MAGDALENA. - FR. HENRICUS A S. TERESIA. - FR. IOANNES A IESU MARIA. - FR. IOSEPH A IESU CRUCIFIXO. - FR. PETRUS A MATRE DEI. - FR. MELCHIOR A S. MARIA. - FR. REDEMPTUS M. A CRUCE. - FR. ISIDORUS M. A IESU. - FR. LADISLAUS A MATRE DEI. - FR. THOMAS A S. IOANNE A CRUCE.